

FILED

FEB 15 2022

Mae

ASSISTANT CLERK OF COURTS
REPUBLIC OF THE MARSHALL ISLANDS

**IN THE TRADITIONAL RIGHTS COURT
OF THE
REPUBLIC OF THE MARSHALL ISLANDS**

MORTON RILOMETO and MISAKI RILOMETO, vs. MARINEY KABUA, vs. TOKO BOTLA and ALMET MOORE, Rikabojrak.	CIVIL ACTION NO. 2018-006 <u>LEMNAK IM UAAK EO AN TRADITIONAL RIGHTS COURT EO</u>
---	---

RO UAAN PANEL EO: Grace L. Leban
Presiding Judge, TRC

Nixon David
Associate Judge, TRC

Claire T. Loeak
Associate Judge, TRC

JKIN RONJAKE EO: Majuro Courthouse

RAN IN RONJAKE KO: December 14th-17th, 2021 & January 11th, 2022

IAKWELEL KO IKOTAN PARTY KO

Keij in ej walok jen iakwelel im tarbok eo ikijen won eo ejimwe im ekkar bwe en kabjor maron ko an Alap im Senior Dri-Jerbal ion Enekotkot ilo Malel, aelon in Arno (“Enekotkot”). Ekkar nan Riabnono ro, Morton Rilometo im Misaki Rilometo, erro ej ba bwe lellap eo jinerro, Kate, ear juon kanin lujen Lijor, ak juon eo Lijor ear watoke einwot ne ear kobban lojen. Kin melele in, Riabnono rein rej tomak bwe jen Lijor nan Kate, einwot an walok ilo Plaintiff Exhibit “A”, menmenbwij eo an bwij eo an Neijebjeb jen aelon in Arno, ejimwe im ekkar bwe Morton

Rilometo en kabjor maron eo an Alap im Misaki Rilometo en kabjor maron eo an Senior Dri-Jerbal.

Riabnono rein rej bareinwot ba bwe kin an kar Neiboria im Liwinrak jumae Iroj eo ilo tore eo, Iroj Jiwirak, innem Iroj eo ear bok maron ko ion Enekokot jen erro, im jabrewot abnono ko rej walontak ikijen maron ko an Neiboria im Liwinrak, rej aikuij ejelok kitier ekkar nan Mantin Majol.

Im ekkar nan Riabnono rein, Rijumae Abnono eo, Mariney Kabua, ejjab jimwe im ekkar bwe en kabjor maron ko an Alap im Senior Dri-Jerbal ion Enekokot, einwot ke kalimur kein ruo, Defendant's Exhibit "A" eo im ear komman ilo 1973, im Plaintiff Exhibit "C" eo im Rikabojrak rein rar bareinwot lemaantak einwot Rikabojrak Exhibit "I-5", eo ear pael ilo High Court ilo 1989; mekarta rej jet kalimur ko im watoki ke Neiboria ear kommani nan kajolet Ankien Joram, ijo wot ke, Riabnono rein rej ba bwe eltan pein Neiboria ilo kalimur kein ruo rej einjuon jen dron, im bwe maron ko ilo juon imon bwij rejjab maron etal nan ro rejjab uwaan bwij eo elane rar jab kebaake bwij eo kaki mokta. Ekkar nan Riabnono rein, Rikabojrak Almet Jiwao Moore ejjab ekkar nan an kabjor maron eo an Alap ion Enekokot einwot ke lellap eo jinen, Winrak, ej nejin Kilaine, eo nejin Jamos, juon emaan; im kin menin, Rikabojrak Moore ej jen botoktok. Erro ej ba bwe iumin Mantin Majol, ro nejin bwij rej jolet mokta jen ro nejin botoktok. Im einwot ro bwijjin Lijor, eo erritolok jen Neiboria, im rej mour wot rainin, ejimwe im jejjot bwe abnono ak kajitok ko aer ikijen maron ko ion Enekokot ren anjo ion im le imaan abnono im kajitok ko an ro jet.

Riabnono rein rej bareinwot ba bwe Rikabojrak Toko Botla ejjab ekkar bwe en kabjor maron eo an Senior Dri-Jerbal ion Enekokot einwot ke ear jab maron in jadre imaan court nan an kamol ke Neiboria ear kokajiriki e, im kinke Rikabojrak Almet Jiwao Moore ear jab bar maron in kamol melele in an Rikabojrak Toko Botla.

Ilo juon bar wawein, Rijumae Abnono eo ilo keij in ej ba bwe ejimwe im jejjot bwe en kabjor maron ko an Alap im Senior Dri-Jerbal ion Enekokot kinke lollap eo jemen, Ankien Joram, ear

wor an jolet ilo kalimur eo an Neiboria, Alap im Senior Dri-Jerbal eo an Enektkot ilo torre eo. Ej bareinwot ba bwe ejimwe im jejjot bwe Neiboria en kommane kalimur in einwot juon Alap in Enektkot, ilo an ejelok Irojilaplap ak Iroj-edrik ej kabine kinke ear ejelok Iroj in Enektkot ilo torre eo maantak nan rainin. Im ekkar nan Rijumae Abnono eo, book eo an Amata Kabua (“Kabua”) nae etan, *Customary Titles and Inherent Rights*: ej kwalok ke Irojilaplap eo im Alap eo, erro ej ilontata nan komman jemlok ko nan na wawein jolet ilo juon bwij. (Kabua, 1993). Im ilo an ejelok Iroj in Enektkot, maron eo ilontata ebed ibben Neiboria. Kin menin, Rijumae Abnono eo ej ba ejimwe im ekkar bwe en kabjor maron ko an Alap im Senior Dri-Jerbal ion Enektkot einwot juon eo ej binej jenkwon lollap eo jemen, Ankien Joram.

Rijumae Abnono eo ej kwalok an jab erra ibben Rikabojrak ro ilo aer ba bwe ej erro eo ejimwe im ekkar bwe ren kabjor maron ko ion Enektkot kinke ejabwe kein kamol ko nan jiban kabin iakwelel ko aerro ikijen maron ko ion Enektkot. Rijumae Abnono eo ej bar ba bwe ekkar nan book eo an Jack Tobin (“Tobin”), juon *anthropologist* ak juon eo ej komman an ekkatak kin wawein mour ko an armij; ej kalikar melelein kokajriri bwe ej wawein eo im juon armij ej lale im kojbaroke juon ajri. (Tobin, 1956). Im Rijumae Abnono ear ba bwe ejelok an melele in ke jemen, Ankien Joram, ej kokajriri an Ezkel. Ak ej melele bwe lollap eo jemen ear jowj nan Neiboria im emman an lale, im unin an kar Neiboria kajolete jemen kake jikin in. Ej ba bwe ro ilo bwij eo ear wor aer melele kake kalimur eo an Ankien Joram jen torre ko maantak nan rainin im ej walok bok in ilo keij in. Menin ej bareinwot alikar, ekkar nan Rijumae Abnono eo, ilo an walok ro im rej jukjuk im amnak ion Enektkot rainin: ej ro nejin Rijumae Abnono eo. Im melele in, ejelok ear jumae im kariabe imaan court in.

Ejja ilo jekjek in wot, Rikabojrak rein, Almet Jiwao Moore im Toko Botla, erro ej ba bwe Riabnono rein, Morton Rilometo im Misaki Rilometo, rej jet ro nejin Kate, eo im Lijor ear kokajriri. Rej bareinwot ba bwe lollap eo jemen Rijumae Abnono in ilo keij in, Ankien Joram, ej bareinwot juon kokajriri nejin Ezkel. Rikabojrak rein rej ba bwe Almet Jiwao Moore ejjab kokajriri ak ej uwaan wot bwij eo einwot ke ej nejin Winrak, im ej alikar ilo kein kamol eo an Riabnono eo, Plaintiff Exhibit “A”. Rikabojrak rein rej ba bwe ekkar nan Mantin Majol, kokajriri ejjab maron jolet maron ko an Alap ak Senior Dri-Jerbal ion bwidej ko an bwij eo kar

kokajriri mae ien eo emoj an maat bwij eo im botoktok eo jimor. Im rej bareinwot ba bwe ej aikuij alikar im weppen jen bwij eo mokta jen an juon kokajriri jolet ilo imon bwij. Im kinke Rikabojrak Almet Jiwao Moore, ej juon eo erittotata ian ro uwaan bwij eo, ejimwe im ekkar bwe en kabjor maron ko an Alap ion Enekokot. Rikabojrak Almet Jiwao Moore ej ba bwe melele in ej bar walok ilo book eo an Tobin ikijen an Mantin Majol kolaajrake wawein jolet ko ilo imon bwij, im wawein aer jelet juon kokajriri. Ejja ilo jekjek in wot, Rikabojrak in ear kir tok Hepisos Kotton, eo Panel in ear kile bwe ej juon eo eritto im emelele kin Mantin Majol, nan an bareinwot kwalok melele ko ikijen jekjek im wawein jolet ilo imon bwij einwot juon kokajriri. Rikabojrak Almet Jiwao Moore ear maron in kabinelok iakwelel in an ke juon kokajriri enaj maron jolet ilo imon bwij ne enaj maat ro uwaan bwij im botoktok eo jimor. Im ilo wawein in, ejimwe im ekkar bwe en e eo ej kabjor maron ko an Alap ion Enekokot.

Rikabojrak Toko Botla, ej ba bwe einwot juon eo im erittotata ian ro nejin kokajriri, ejimwe im jejjot bwe en kabjor maron ko an Senior Dri-Jerbal ion Enekokot. Botab Rikabojrak Toko Botla ear jab maron jede imaan court in nan an kamol ikijen abnono ak claim eo an ke ej kokajriri nejin Neiboria, im bwe ejimwe im jejjot bwe en kabjor maron eo an Senior Dri-Jerbal ion Enekokot.

KAJITOK KO KAR LETOK NAN PANEL EO BWE EN UAAKI

1. Iumin manit eo im iminene in mour ko ilo Marshall Islands, ilo imon bwij, Alab eo emaron ke make kommane juon kalimur eo watoke ejimwe, ilo an ejelok en ej kabjor maron an Irojlaplap ak Iroj-edrik, ikijen lajrak, jimwe, im maron ko ion bwidej eo? Elane aet, ewi wawein an maron kommane?
2. Ilo imon bwij, ro uwaan bwij ak botoktok eo im rej mour wot, elab ke aer maron jolete jimwe im maron ko an Alap im Senior Dri-Jerbal, jen kokajriri eo ej jolet kin juon kalimur?
3. Iumin manit eo im jen iminene in mour ko ilo Marshall Islands, juon kokajriri eo watoke ej kanin lujen, emaron ke jolet maron ko an Alap ak Senior Dri-Jerbal ilo juon imon bwij? Elane aet, ewi wawein an maron jolet?

4. Alkin etale uak ko ilo kajitok 1, 2, im 3, won eo kio ikotaan Riabnono Morton Rilometo, Rijumae abnono Mariney Kabua im ri-kabojrak Almet Jiwao Moore, ekkar im ejejot bwe en kabjor maron eo an Alap ion Enekokot, Malel, Arno Atoll? Etke?
5. Alkin etale uak ko ilo kajitok 1, 2, im 3, won eo ikotaan Riabnono Misaki Rilometo, Rijumae abnono Mariney Kabua im ri-kabojrak Toko Botla, ekkar im ejejot bwe en kabjor maron eo an Senior Dri-Jerbal ion Enekokot, Malel, Arno Atoll? Etke?

UAK NAN KAJITOK EO

1. Aet, juon Alap eo ej kabjor maron ko jimor an Alap im Senior Dri-Jerbal emaron kommane juon an kalimur ilo jejjot im jimwe elane bwidej eo ej kalimur kake ejelok Iroj in, einwot ke ilo an ejelok Iroj ion juon jikin, maron eo ilontata ebed ibben Alap eo. Ijo wot ke, kalimur ej bin elane ejelok jen uwaan bwij ak botoktok eo ej jumaiki.
2. Ro uwaan bwij ak botoktok eo ej er eo rej jolet maron ion juon imon bwij imaantata, im elane emaat uwaan bwij ak botoktok eo, innem kokajriri eo emaron in jolet. Ijo wot ke, elane ear wor juon kalimur eo ewor kitien im emoj kabine ak erra kake, innem kokajriri eo emaron in jolet, mekarta ej wor wot uwaan bwij ak botoktok eo rej mour wot.
3. Aet, juon kokajriri eo watoke kanin lujen emaron jolet maron an Alap ak Senior Dri-Jerbal ion juon imon bwij elane emaat ro uwaan bwij ak botoktok eo jimor, im elane ear wor juon an kalimur eo ewor kitien im emoj an ro uwaan bwij eo im rej mour wot erra kake.
4. Almet Jiwao Moore ej Alap eo ion Enekokot, ekkar nan menmenbwij eo an Neijebjeb im kalimur eo an Neiboria ilo 1989 ej kalikare.
5. Mariney Kabua ej Senior Dri-Jerbal ion Jittaken, Enekokot im Almet Jiwao Moore ej Senior Dri-Jerbal ion Jittoen, Enekokot

einwot an alikar ilo kalimur eo an Neiboria ilo 1989.

MELELE KO IM UAAK KEIN REJ BEDBED IOIER

Alkin an panel eo etale aoleb kein kamol ko jen party kein jilu ilo case in, ear keidi aoleb melele kein im kein kamol ko ilo an bareinwot lale kajitok kein litok jen High Court eo nan uaki. Ekkar nan melele ko walok ilo case in, Riabnono Morton Rilometo im Misaki Rilometo rar kajeon wia kake Enektokot. Ijo wot ke, wia kake in ear jab maron bok jikin einwot ke Rijumae Abnono Mariney Kabua im Rikabojrak rein, Almet Jiwao Moore im Toko Botla, rar kabojrak wia kake in. Kin menin Riabnono ro rar wonmanlok wot im boktok abnono in aer nan court, nan lale won ekkar im ejimwe bwe en kabjor maron ko an Alap im Senior Dri-Jerbal ion Enektokot.

Riabnono ro rej tomak bwe ejimwe im jejjot bwe maron kein ruo an kajur, Alap im Senior Dri-Jerbal, ren etal nan erro einwot ke erro ej walok jen bwij ak rej nejin kora, kinke jinnero Kate ej kokajriri an Lijor, eo im ej uwaan bwij eo ilo Enektokot, im ej alikar ilo Plaintiff Exhibit "A", menmenbwij eo an Neijebjeb jen Enektokot. Ejelok ear kariabe melele ko loan menmenbwij in. Riabnono rein rej bar ba bwe Irojij Jiwirak, kar Irojij eo an Enektokot torein mour eo an, ear bok maron ko an Alap im Senior Dri-Jerbal jen Neiboria im Winrak jen wot aerro kar jumaik Irojij in. Kin menin, Rijumae Abnono Mariney Kabua im Rikabojrak rein, Almet Jiwao Moore im Toko Botla, rejjab kar aikuij kabjor maron ko ion Enektokot itok wot jen lia in an Neiboria im Winrak. Ij wot ke, ejelok kein kamol ko rej kalikar ke ear jako maron kein an Alap im Senior Dri-Jerbal jen Neiboria im Winrak ilo Enektokot. Bareinwot, Riabnono rein rej jet ro nejin Kate, kokajriri eo an Lijor, eo im ekkar nan menmenbwij eo an bamle in, erittolok jen Neiboria. Im ilo an ejelok kalimur, laajrak in jolet eo an Riabnono rein ej aikuij itok elkin ro nejin bwij im botoktok.

Riabnono rein rej bareinwot ba bwe Rikabojrak Almet Jiwao Moore ejjab jimwe im jejjot bwe en kabjor maron eo an Alap ion Enektokot einwot ke lellap eo jinen, Winrak ej itok jen botoktok kinke lellap eo jinen, Kilaine, nejin Jamoj, im melelein bwe Rikabojrak Almet Jiwao Moore ej itok jen botoktok ak ej nejin emaan. Ekkar nan Mantin Majol, ro nejin emaan ak botoktok rej jolet elane enej loot bwij eo. Panel in ej erra ilo melele in. Botab, Kilaine, kora eo

nejin Jamos, jen botoktok, ear maron jidaak juon bwij kaal jen e ibben kora eo nejin, Winrak. Ear loot bwij eo ibben Neiboria ilo an kar ejelok kobban lojen im ilo an walok jekjek in, wawein jolet maron ko ion bwij enaj etal nan eo erittotata jen botoktok eo mae ien eo enaaj jidaak juon bwij kaal. Panel in ej tomak bwe ear jidaak juon bwij kaal ibben Winrak, eo nejin Kilaine im ear walok jen Jamos. Kin menin, Rikabojrak Almet Jiwao Moore, eo emour rainin im erittotata nejin Winrak im ej walok jen bwij eo, ej eo alikar ke ejimwe im ekkar bwe en kabjor maron ko ion imon bwij ko im Neiboria im Winrak rekar kabjor maron ie.

Riabnono rein rej bar ba bwe Rikabojrak Toko Botla ejjab aikuj kabjor maron an Senior Dri-Jerbal einwot ke e make, ear jab jadre imaan Panel in nan kamol kajitok in an bwe court in en kile e einwot juon Senior Dri-Jerbal ion Enekokot einwot juon an Neiboria kokajriri.

Bareinwot, Rikabojrak Almet Jiwao Moore ear jab maron kamol iakwelel in an Rikabojrak Toko Botla ke e, ej kokajriri nejin Neiboria.

Alkin aolep men kein, Panel in ej kile bwe Neiboria ear kabjor maron eo an Alap im Senior Dri-Jerbal ion Enekokot. Elane ear jab juon Alap im Senior Dri-Jerbal ion Enekokot, innem enaj kar ejelok an maron in komman kalimur ko ikijen ijoko jikin bwij in ilo Enekokot im ijoko jet, einwot an alikar ilo Defendant Exhibit "A" - *Pepa in Kalimur* eo ilo 1973, im Plaintiff Exhibit "C" ak Intervenor Exhibit "I-5" - *Baber in Kalimur* eo ear pael ilo High Court ilo 1989. Panel in ej bareinwot kile bwe Neibora ear kile Winrak einwot juon eo enaj bok jikin alkin an jako.

Wawein in ej alikar ilo kalimur eo kommane ilo 1989 im emoj an kalikare einwot Plaintiff Exhibit "C" im Intervenor Exhibit "I-5". Kin menin Panel eo ej tomak bwe laajrak in jolet ilo bwij eo ear wonmanlok wot nan rainin. Ilo wawein in, Panel in ej tomak bwe ejimwe im jejjot bwe Rikabojrak Almet Jiwao Moore en kabjor maron ko an Alap ion Enekokot, im bareinwot kabjor maron eo an Senior Dri-Jerbal ilo Jittoen, Enekokot im ijoko jet jikin bwij eo, einwot an alikar ilo Plaintiff Exhibit "C" im Intervenor Exhibit "I-5".

Ikijen melele ko rejelet kokajriri im wawein an juon kokajriri maron in jolet ijoko jikin bwij eo ear kokajririki, Panel in ej erra kake melelein bwe ekkar nan manit, juon kokajriri emaron jolet ijoko jikin ro rar kokajririki elane enaj ejelok ak maat uwaan bwij ak botoktok eo. Im elane ear wor im rej mour wot. Im elane ear wor kalimur eo emoj kabine, bwe en maron kabjor maron

ijoko jikin rein rar kokajririki, einwot an alikar ilo *CA2012-213, Malachi v. Abon*.

Panel in ej kile ke lellap eo jinen Morton Rilometo im Misaki Rilometo, Kate, ear juon kokajriri an Lijor im kar watoke kanin lujen Lijor ilo anemkwoj eo lelok nan e im ro bwijin, bwe ren jukjuk im amnak ion Enekokot weto alkin an Lijor jako. Ijo wot ke ekkar nan manit, kokajriri eo im ro bwijin renaj maron bok jolet wot elane emaat bwij ak botoktok eo im elane ewor kalimur eo emoj kabine. Im kinke ewor kalimur ikijen Ankien Joram jen Neibora tore eo ear kabjor maron in Alap im Senior Dri-Jerbal, innem panel in ej tomak bwe ejimwe im jejjot bwe Mariney Kabua en kabjor maron eo an Senior Dri-Jerbal ilo Jittaken, Enekokot Island, Arno Atoll, einwot an walok ilo Defendant's Exhibit D. Panel ej bar kile melele eo an Riabnono ro ikijen kein kamol Plaintiff's Exhibit F, im loe bwe Wilfred Kendall ear juon eo watoke bwe ejjab kanin lujen Kendall wot, ak ear bareinwot juon eo watoke alikatata uwaan ebeben eo lak ilon im bwe Iroj eo ilo tore eo, Iroj Hermious ear kile bwe en etal maron eo nane einwot juon jemen ro lak ilal alikatata ilo ebeben eo an *Jacob v. Hermios v. Kendall*. Wawein in ej kabinlok tomak in bwe mekarta Lijor ear watok Kate einwot kanin lujen, ak ear jab komarone ilo an kile ak ilo an kalimur kake.

MANIT IM IMINENE KO REJELET CASE IN:

- 1. Kanin lujen – juon eo rar kokajririki jen ke ear ajri im watoke einwot ne kar kobban lojen eo ear kokajririki.*
- 2. Imon bwij – juon bwidej, weto, ak aeto eo im ej an bwij eo ak an ro bwijin juon kora.*
- 3. Pikajjok – elane juon ej kelok jen ijin nan ijon, ak ukot tok nan wawein mour, elane juon ej etal im ella lok jen bar juon ak kajoan maron an bar juon im ella lok jene.*
- 4. Kalimur – juon kwon eo emoj an Iroj im Alap, im ro uwaan bwij eo kawepene nan kajolet ikijen maron ion bwidej ak men ko mweien eo ej kommane kalimur eo nan juon eo ej uwaan bwij eo, ak emaron juon eo ejjab uwaan bwij eo.*

KEIDI MANIT IBBEN MELELE KO REMOL

Lijor ear watok Kate, eo im ear kokajiririki einwot juon *kanin lujen*. Ear alikar an kar Lijor watok Kate einwot ne kobban lojen ilo an kar kaamnak kora in nejin im ro jibwin ion Enektkot bwe ren mour im anemkwoj. Ejimwe im jejjot elane ro ilo bwij eo an Lijor einwot ro bwijjin Neiboria im Winrak, ren bar lale im kojbarok rein watok er *kanin lujen* lellap eo jibuer, Lijor. Im bwe rein watok er kokajriri ak *kanin lujen* Lijor ren bareinwot jela nae rein ilo bamle kein an Lijor.

Ej alikar ilo kejj in ke Enektkot ej *imon bwij* einwot an alikar ilo kenono ko im kein kamol ko an kejj in, einwot Plaintiff Exhibit "A", ak menmenbwij an Neijebjeb laltak nan ro bwijjin Lutomwe laltak wot nan rein bwijjin Winrak im rej mour wot rainin.

Naan in *pikajjok* enaj kar kurmol elane ro nejin Kate renaj kar bok maron an Alap im Senior Dri-Jerbal ak ewor wot uwaan bwij im botoktok eo rej mour wot rainin.

Ej bareinwot alikar ilo kejj in bwe Neiboria ear kommane ruo (2) *kalimur* ko ilo torein mour eo an einwot juon Alap im Senior Dri Jerbal an Enektkot. Juon ear kommane ilo 1973 nan kajolete Ankien Joram kin jimwe im maron ko an ion Enektkot. Eo kein karuo ear kommane jet iio tok alik im ear pael ilo High Court eo an Majol ilo 1989. Neiboria make ear kile ibben bwe ejimwe im jejjot elane ej kommane *kalimur* in kein karuo nan Winrak, eo ear bok jikin alkin an jako, ekkar nan menmenbwij eo aer. Ijo wot ke, ijelokin an *kalimur* kin aolepen Enektkot, ear ajej e Enektkot im lelok Jittaken nan Ankien Joram bwe en bed im jerbale, im ijo juon, Jittoen, ekalimur kake nan eo enaj bok jikin.

Ri Kamol an Riabnono:

1. Morton Rilometo
2. Misaki Rilometo
3. Helty Bakol

Ri Kamol an Rijumae Abnono:

1. Kone Ankien

Ri-Kamol an Rikabojrak:

1. Hainrick Mooree
2. Hepisos Kotton

Kein Kamol an Riabnono:

1. Plaintiff Exhibit A – Menmenbwij an Enekokot
2. Plaintiff Exhibit B – Civil Action 72 Judgement
3. Plaintiff Exhibit B1 – English Translation for CA72 Jemlok
4. Plaintiff Exhibit C – 1989 Kalimur (Will) of Neiboria
5. Plaintiff Exhibit D – Civil Action 23 Judgement
6. Plaintiff Exhibit E – Civil Action 81 Judgement
7. Plaintiff Exhibit F – Civil Action 2008-221 Judgement

Kein Kamol an Rijumae Abnono:

1. Defendant Exhibit A – 1973 Kalimur of Neiboria

Kein Kamol an Rikabojrak:

1. Intervenor Exhibit I-2 – Illustration of Menmenbwij
2. Intervenor Exhibit I-3 – Illustration of Liolon Menmenbwij
3. Intervenor Exhibit I-4 – Menmenbwij (Genealogy Chart)
4. Intervenor Exhibit I-5 – 1989 Kalimur eo an Neiboria
5. Intervenor Exhibit I-6 – Civil Action 82 Judgement
6. Intervenor Exhibit I-7 – Civil Action 87 Judgement


Wawein Ko Jet Panel In Ej Loi Bwe Rekkar Nan Walok

Ear wor ruo kalimur ko an Neiboria ikijen Enekokot Island. Juon ear komman ilo 1973 eo im juon ear komman tok alik ilo 1989. Ilo wawein in, Panel in ej tomak bwe mekarta Neiboria ear kommane


juon an kalimur nan Ankien Joram ilo 1973 eo ikijen maron ko an, ak ej bareinwot tomak eo an Panel in bwe Neiboria ear kile tok alik ke ej wor wot ro uwaan bwij eo rar mour wot, im kinke ej manit eo in bwe en etal nan rein ilo bwij eo laajrak in jolet eo ikijen maron ko ear kabjori. Kin menin, Panel in ej tomak bwe Neiboria ear wonmanlok wot im kile Winrak einwot juon eo enaj bok jikin ilo Enekokot, ijo wot ke, ear konan lelok maron eo an Senior Dri-Jerbal nan Ankien Joram ilo Jittaken, Enekokot, einwot an alikar ilo kalimur eo an aliktata ilo 1989.

Panel in ej bar tomak bwe mekarta Rijumae Abnono Mariney Kabua im Riabnono rein, Morton Rilometo im Misaki Rilometo, rej watok er bwijjin kokajriri, ak ej alikar bwe ear etal nan lollap eo jemen Rijumae Abnono Mariney Kabua kalimur jen Neiboria. Elane ear wor an Riabnono rein, Morton Rilometo im Misaki Rilometo kalimur einwot eo an lollap eo jemen Rijumae Abnono Mariney Kabua, innem remaron kar bar jolet maron ijoko jikin jibuier, Lijor. Maron eo ebed ibben bwij eo nan aer lale Riabnono rein, einwot ke lellap eo jineer ej kokajriri im watoke kanin lujen Lijor, eo eritto jen Neiboria. Riabnono rein rej bareinwot watok er nejin kokajriri eo an bwij in. Panel in ej tomak bwe rein bwijjin Winrak im rej kabjor maron rainin ion Enekokot rej aikuij jela lale rein im rej bwijjin kokajriri im ejja ilo wawein in wot, rein bwijjin kokajriri ren jela kile im kautej rein rej eddoik imon bwij kein an ro bwijjin Neijejbep ilo aelon in Arno, elaptata ion Enekokot. Ej manit eo in bwe jen jela nae dron im iakwe dron.


Raan: Papodre 22 2022



Grace L. Leban
Presiding Judge, TRC



Nixon David
Associate Judge, TRC



Claire T. Loeak
Associate Judge, TRC